

Aruba y Surinam a firma un MoU

Unda ta fortalece e relacion bilateral entre e paisnan



DIALUNA 21 di October, President di Surinam Chan Santokhi a yega Aruba acompaña pa First Lady Mellisa Santokhi-Seenacherry pa un bishita di trabou di un dia. Esaki t'e prome biaha cu President Santokhi ta bishita Aruba, pero si den pasado ya pa mas di un ocasion, President Santokhi a reuni cu Prome Minister Evelyn Wever-Croes durante conferencianan na Nacionnan Uni.

Prome Minister ta indica cu durante e bishita di President Santokhi, a firma un Memorandum of Understanding (MoU) unda ta fortalece e relacion bilateral entre e paisnan. Asina Aruba ta fortalece e colaboracion cu Surinam, pa loke ta trata e cooperacion actual pero tambe pa den futuro. Aruba y Surinam tin relacion historico, relacion familiar y na Aruba tin un comunidad di Surinam importante p'e pais.

Den e MoU a yega na acuerdonan cu lo traha hunto riba diferente tereno manera economia, comercio, agricultura, medio ambiente, turismo, educacion, cultura, salud, migracion y seguridad, entre otro. Despues di firma e MoU, e dos mandatarionan a compromete nan mes pa crea grupo y comisionnan cu ta encarga y traha riba e puntonan di e contenido di e MoU.

Durante e reunion cu Prome Minister, President Santokhi a enfatisa cu el a keda sumamente satisfecho cu e bishita y ta impresiona cu e trabou cu Gobierno di Aruba ta haciendo p'e pais. Desde e recepcion durante su yegada na Aeropuerto y durante tur su bishitanan, el a wordo bon ricibi y ta gradici Aruba p'e cariño ricibi y e recepcion ameno. Principalmente e president a gradici Prome Minister y su staff p'e bon preparacion y e organisacion p'e dia aki y cu tur esaki a conduci



n'e MoU cu a firma entre e dos paisnan. Tambe durante su estadia, President Santokhi a reuni cu Gobernador di Aruba, S.E. Alfonso Boekhoudt, cu Ministeraad y cu Presidente di Parlamento.

Na final di e reunion, President Santokhi a expresa cu e ta contento di por a yega n'e MoU cu Aruba y asina por sigui amplia e relacion y colaboracion entre Aruba y Surinam y ta sigur cu hunto por sigui desaroya un futuro maravioso p'e dos paisnan den beneficio di e pueblo di e dos paisnan.

"Mi kier a gradici President Santokhi, Minister Ramdin y henter e delegacion p'e bishita. Tambe mi palabra di gratitud na tur esnan cu a traha pa haci e bishita posibel y cu nos por a yega n'e MoU pa asina fortalece e relacionnan entre Aruba y Surinam. Cu esaki un bunita futuro ta warda nos. Mi ta invita ciudadano y esnan cu tin conexon cu Surinam pa haci uzo di e oportunidadnan aki. Aruba y Surinam por wak dilanti na oportunidadnan importante na beneficio di e dos paisnan", Prome Minister a expresa.